

Rapport annual 2017

Alla fin digl onn 2017 munta igl inventari dalla Biblioteca Trun 5626 medias, quei 2614 per carschi, 1619 per giuvenils e 1393 per affons. La biblioteca ei stada aviarta 177 dis. Durent quei temps han 1860 persunas visitau la biblioteca ed han empristau biabein 4100 medias.

Naven dil schaner entochen il zercladur havein nus purschiu a nossa clientela mintga jamna ina pintga presentaziun da cudischs. Treis tochen otg persunas fetg interessadas ein mintgamai stadas presentas ed han aschia elegiu lectura ch'ei havessan schiglioc buc.

Nossas truccas da cudischs per ils bauns da leger ein dil matg entochen igl october stadas postadas els loghens usitai; a Trun spel Rein ed a Carmanera, a Davaruns-Schlans ed ad Ignu-Rabius.

Venderdis sera, ils 25 d'uost, havein nus astgau guder dad Arno Camenisch openair ina prelecziun dil cudisch «Die Launen des Tages» ella sculptura OGNA da Matias Spescha. L'aura ei stada grondiusa ed aschi ein varga 70 persunas serendi a Trun per passentar enqual mument magic.

Per l'jamna bibliotecara cul tema «bookselfie» havein gia la primavera dumandau scolastAs per lur cooperaziun. La scoletta Trun, la 1. e 2. classa da Rabius e la 5. classa da Sumvitg han allura fatg fotografias en connex cun in cudisch. Era nossa clientela ei separticipada ed ha tarmess bookselfies. Gliendisdis, ils 11 da settember, havein giu la vernissascha ed envidau tier petta e da beiber las classas ed era geniturs e visitaders.

La casa editura Somedia ha ediu il comic «Fra Clau da Flia» per il giubileum da 600 onns commemoraziun cun la translaziun romontscha da Giusep Decurtins-Deplazes. Ensemen cun la Pleiv Trun havein presentau il cudisch cun maletgs e raquents en baselgia, la dumengia ils 24 da settember, e da messa da scola il november.

La ULR Uniun per Litteratura Rumantscha ha dumandau nus d'astgar vegnir sin viseta cul project «Punct dubel» cun ina prelecziun dubla da Romana Ganzoni e Rico Tambornino. Venderdis, ils 29 da settember, havein giu la biblioteca pleina cun in publicum interessau.

Entras leger.GR han las scolas la pusseivladad dad envidar in autur per ina prelecziun igl october. Pil scalem superiur ha scolast Armon dumandau per ina presentaziun da fotografias da Thomas Sbampato da Dietlikon da ses cudischs e reportaschas da ses viadis en l'America, Kanada ed Alaska.

Per la notg da raquents, venderdis ils 10 da november, havein envidau Arnold Spescha e Hans Fäh per ina prelecziun dallas poesias ord il cudisch «Ei catscha dis» per romontsch e tudestg. Musicalmein han Manuela e Rico Schwarz embelliu la sera. In auditori fetg interessau, dalunsch e dameneivel, ha visitau e gudiu ina emperneivla sera.

Sonda, ils 23 da december, havein nus astgau beneventar Mario Pacchioli oriunds da Rabius che ha presentau sia nova ovra REMAS en Sala da cultura. Cun Anita Capaul dalla CER Chasa editura Rumantscha e Mariano Tschuor, meinaproject, ha il grond publicum survegniu investa ella lavur che stat davostier. Mario ha cantau diversas canzuns ord il cudisch. Silsunter ei la gliedugugen stada aunc in mument per discuorer e guder in glas vin.

Per la Biblioteca Trun: *Olivia Pfister-Tgetgel, caubibliotecara*